

Vizyon

SPPF pe plonz Sesel dan difikilte

Semenn pase ankor enn fwa SPPF in anmenn en lot laont pour Sesel. Nou'n aprann dan lapres enternasyonal ki Gouvernman pa'n pey bann investiser etranze ki ti'n aste 'bonds' ki Sesel avek led lakonpanyen finansyel, Lehman Brothers ti'n met lo marse enternasyonal pou ganny larzan vitman. Sa repeyman i lentere lo en sonm US\$230 milyon!

Pou fer keksoz pli pir, akoz sa difikilte pou repey son det, repitasyon Sesel lo marse enternasyonal in ganny degrade sorti lo nivo B pou arive lo 3C-. Sa nouvel in propaze e ti'n pi dan tou nouvel finansyel dan bann kapital Eropeen.

Sa de levenman ansanm i reprezant en pa an aryer pour nou pei e i osi kapab anmenn pli move dezas finansyel ki nou'n deza eksperyanse. Kestyon ki tou dimoun pe demande se: Eski Sesel pou kapab onor sa bann term repeyman dir ki i war li pe fas avek? Eski nou ti'n merit aksepte pou met nou lekor dan en tel pozisyon difisil avek en to repeyman 9.125% koman lentere? Pa oublie ki deza an Zilyet nou tin ganny difikilte repey en lot loan US\$85.3 milyon.

Lanbarasman politik

Parey zot labitid SPPF pa'n anvoy okenn minis lo SBC pou eksplik sa sitiasyon konnmi i en pti zafer. Se Mr. Ahmed Afif ki'n bezwen sov en lanbarasman politik konsernan sa dezord ki annan dan sistenn finansyel nou pei. Ler pou prete e zot gannyen, se Minis ki vin devan konnmi zot en ero pou Sesel, me ler i annan laont, zot sov par laport deryer.

Kan Gouvernman pa onor repeyman son det, se repitasyon Sesel avek byennet son pep ki ganny afekte. Aprezan nou vwar nou dan en sitiasyon kot zis labank komersyal ki pare pou pret nou larzan e byensir zot tre strik avek bann term e kondisyon repeyman ki kout ser.

Move zestyon e planifikasyon

Seselwa fodre nou realize ki lafason Gouvernman SPPF pe zer resours finansyel nou pei pe trenn nou dan gran difikilte e deza nou vwar nou pe al ver en semen ki kapab fer nou bokou ditor. Avek en det ki enorm, repeyman i en lakoz prensipal sa mank deviz etranzer dan pei ansemoman. Tou larzan i al zis pou pey det, e ansanm avek gaspiyaz, nou pei pe reste dan sa gran kriz ekonomik.

Ziska kan SPPF pou fer nou onte?

Sa bann sitiasyon i vremen fer Sesel onte. SPPF in fer Sesel perdi son repitasyon. Sesel pa ganny regarde koman en pei ki vremen serye. Sa repitasyon ki nou pe perdi anba SPPF i kapab fer nou pei gran ditor lonterm.

Felisitasyon Zenn atlet!!

Mr. Wavel Ramkalawan ek SNP i felisit tou bann zenn atlet ki'n partisip dan 6em Zve CJSOI. Nou oule sirtou eksprim nou lapresiasyon pou zefor bann ki'n fer paviyon Sesel flot pli o. Zot volonte e disiplin i dwatet en bon lekzanp pour tou lezot zenn pou met Sesel an premye.

Felitasyon osi pour tou volonter ki'n donn zot letan avek granker pou asir sikse sa zve. Zot bonn volonte in ankor montre ki Sesel i pour nou tou e ki fodre nou travay ansanm koman en nasyon pou asir son sikse.

Tou sa ki'n travay avek lorganizasyon sa zve, sa ki'n prepar bann zenn e osi ede finansyerman, in demontre ki byennet nou lazenes i tre enportan. Alor fodre nou touzour pare pou avans devan san lafreyer kan nou pei i bezwen nou pou siport li. En tel determinasyon pou ed nou avans devan

In ler pour sa bann gran sef dan SPPF aret anmenn nou pei dan sa sitiasyon. Vin transparan, koup koripsyon e donn tou Seselwa menm sans dan nou pei.

SNP i met Sesel premye

En gouvernman SNP pou travay pou kree en lekonomi modern, ki stab e ki pou fer progre. Nou pou pran tou mezir nesaser pou redres lekonomi, sa pou enkli pli bon planifikasyon dan depans pei e osi repeyman son det. Nou konvenki ki sa pou anmenn prosperite pour tou Seselwa e re-etabli repitasyon Sesel koman en pei kot Seselwa i kapab viv byen fyer, san bezwen lager dipen e ki bann investiser i kapab fer biznes avek. Seselwa, ouver nou lizye e konpran byen ki ozordi nou pei anba SPPF i dan en gran kriz e Jj in fini bite!

koman en nasyon.

Dan en lepok kot lazenes Seselwa pe fer fas avek bokou defi parey drog, lalkol ek lezot fleo sosyal, zot in montre nou ki nou kapab kont lo zot pou kree en lanvironnman ideal pour lepanouisman bann zenn avek bann konportman akseptab pour nou pti pei.

Zot zefor in ganny rekonnnet e sa in ransorsi determinasyon SNP pou kontinyen travay afen ki lazenes Seselwa i ganny bann pli bon fasilite e tou loportinite nesaser pou ed li grandi.

Nou lazenes in montre nou pei ki many-er nou devret viv e donn tou dimoun menm sans ek loportinite. Se dan sa fason ki nou pou fer nou paviyon flot avek lafyerte. Annou les nou ganny gide par lekzanp sa bann zenn artis ek sportif CJSOI e annou vin pli determinen pou relev Sesel.

Aret zwe politik avek lakaz

SNP i partaz dezapwentman lepep dan lafason gouvèrnman pe zer siti-asyon mank lakaz dan nou pei. Pandan sa dernyen trimes Lasanble Nasyonnal, a plizyer repriz Minis pour Devlopman Nasyonal, Mr. Jacquelin Dugasse in vin reponn kestyon lo lakantite demann i annan dan sak distrik e ki lapli- par pou ganny en lakaz lo zil Perseverans. Me ki kantite laverite i annan dan sa bann deklarasyon Mr. Dugasse? Eski tou sa ki byen merit en lakaz pou ganny enn, ouswa pou annan lapreferans politik ankor?

Proze i an retar

Sa proze limenm pe ganny en kantite retar akoz logmantasyon dan pri materyo konstriksiyon e gouvèrnman pe ganny gran difikilte pou onor son loblasyon. Dan milye tousala i annan en kantite zwe politik dan tou

biro Ladministrasyon Distrik avek sa size lakaz. Dimoun pa zanmen konnen ekzakteman ki tyenn zot ete lo lalis priorite. Ki annan ladan pou kasyet? E i annan landrwa kot kantmenm i ase fasil pou antreprann serten devlopman deswit, SPPF pe refize fer li zis pou pini bann zabitan, tel ki dan Corgat Estate.

Proze Perseverans pou aste vot

Pli move ankor, SPPF i anvi servi proze Zil Perseverans pou li aste vot pou re-eksyon James Michel dan prosen eleksyon Prezidansyel. Akoz ki sa bann lakaz ki ti ganny servi koman vilaz Zwe CJSOI pa pou ganny donnen ziska 2010? Eski sa bann lakaz pa ti ganny konstrisyon pour bann fanmiy Seselwa? Tou fasilite ladan i bon, alor, donn lepep en lakaz silvouple. Sa bann lakaz pa ti fer pour atlet, me pour fanmiy Seselwa.

Polisi SNP i kler

Lo size lakaz polisi SNP i tre kler. En gouvèrnman SNP pou garanti ou drwa ganny en lakaz. SNP i angaz li pou met an plas en program lakaz kontinyel ki pa fikse zis lo bezwen politik. Nou angaze pou konstrisyon omwen 500 lakaz sak lannen pou vann oubyen lwe, elarzi program 'land bank,' etabli en program reparasyon regilye, donn en rikord repeyman sak lannen e ou pou annan drwa war lalis priorite. Ou sans ganny en lakaz i sir avek SNP. Ozordi nou fer en lapel pour ki SPPF i aret servi lakaz koman en zwe politik. Ed tou Seselwa, pa zis en bann pour rezon politik. Lakaz i en nesosite pour tou dimoun. Alor fodre SPPF i aret kwar ki si ou pa siport li ou merit reste anba ros.

Tro bokou logmantasyon

Leprep pe kriy ayoyo avek sa bann doz logmantasyon ki nou pe tandé tou le semenn. Sa sitiasyon pe afekte tou Seselwa spesyalman bann ki ganny saler pli ba. Sa ki pli fer lapenn ankor se ki letan pri dile, juice, limonad avek yogurt i monte, se bann zanfan ki soufer akoz zot paran pa annan pou donn zot sa ki zot bezwen.

Dan bokou pei, gouvèrnman pe travay lo diferan plan pou sibvansyon pri plizyer komodite e ede soulaz souffrans lo zot popilasyon. Ki plan gouvèrnman Jj i annan pou Sesel? Sanmenm sa meyer lavi ki zot ti prout nou? Olye keksoz amelyore Seselwa pe vin pli mizer. Jj i fini bite. Fer eleksyon.

Fer pli bon plan

Anmenmtan ki nou rekonnèt zefor e sikse nou bann zenn dan 6enn Zwe CJSOI, SNP i konsèrnen avek sa latitid 'meday lor pou lorganisasiyon.' Bon planifikasyon i reste en gro defo SPPF. Se selman komansman sa lannen par ekzanp ki zot ti anmenm en bidze siplemanter devan Lasanble Nasyon pour sa zwe, malgre i ti en levenman ki 2an pase nou ti okouran nou pe al organize.

Sa mantalite pou touzour met nou dan difikilte e abes performans nou bann atlet. Seselwa in dezapwente par ekzanp pou war ki dan en posibilite 6 meday lor pou bann spor par lekipe, Sesel in sorti venker zis dan konpetisyon volleyball fiy!

Lefet ki sa zwe ti pe organiz se nou, nou ti'n dwatet pli byen prepare pou fer fas avek nou 3 pli gran adverser tradisyonel. Djibouti avek Mayotte pa konte, alor i kler ki Sesel in sorti 4enn par deryer La Reunion, Moris avek Madagascar. Avek tou sa sipor piblik, lepep ti anvi en meyer klasman zeneral.

La ki Sesel pe prepare pou akeyir 7enn Zwe de Zil an 2011, SNP i demande ki tou preparasyon i demar byen boner. Nou demann gouvèrnman pou realiz swe piblik Sesel. Konstriksiyon okenn nouvo lenfrastriktir, preparasyon atlet e lezot lozistik i merit bann keksoz ki pe mars anba en bon plan ki'n finalize byen boner.

PAS PARTOU

Sef ti byen pase

Parol ki deor pe dir ki serten sef ti byen pase pandan zwe CJSOI. Ou tya kwar en nouvo supermarket in ouver kot manze ti kwi pour bann atlet. Bal diri ti'n ganny 4 lapat! Sa wa dir lepep!

An retar!

Parey tou dimoun i konnen, konplent manze pa ti manke lo vilaz. Me sa ki pli gou se lefe ki kontener manze ki ti kout 50mil dolar ti rantre dan pei lavey ki zwe ti fini. Tya bon pour lepep konnen kote tou sa bann 'goodies' in ale. Donn lepep enpe!

Family Fun Day

Nou envit tou dimoun pou zwenn nou dan en Family Fun Day **Vendredi le 15 Out kot Lasal Parwasyal Glacis aparti 2pm. Vin pas en moman agreab avek nou!**

Konvansyon Madanm

SNP i enform tou madanm ki konvansyon madanm pou fer Dimans le 7 Septanm kot Sant Konferans Enternasyonal aparti 3er apremidi.

SNP Lottery

WIN WITH THE SNP!

PRIZES

- 1st : Family holiday : Four return tickets to Mauritius + 7 days accommodation on BB
- 2nd : Two return tickets to Singapore
- 3rd : Two nights HB at La Reserve Hotel, Praslin
- 4th : Two nights BB at L'Archipel Hotel, Praslin
- 5th : SR5000 cash
- 6th : SR5000 cash
- 7th : One washing machine
- 8th : One refrigerator
- 9th : One TV set
- 10th : One DVD player
- 11th : One Guitar
- 12th-20th : Consolation prizes

R10/-

Draw on **December 20, 2008**

Nou Pa Pou Zanmen Les Tonbe!